

江南通志


自卷三十四
至卷三十五

內閣文庫			
函	冊	號	類
二	六	三	漢書
一	四	九	

內閣文庫			
函	冊	號	類
三	九	二	漢書
一	九	九	

(五七芥)

內閣文庫	
番號	漢 3969
冊數	692 (75)
函號	291 97



江南通志卷三十四

輿地志

古蹟 五 安徽寧池四府

安慶府

宜城卽今懷寧縣治宋景定元年始築宜城建康志云
宜城者雁汊對岸一要害處吳魏相拒時嘗築城於此
其後方言訛疑爲宜一云晉郭璞謂此處宜城故呼爲
宜城今有宜城渡在府西康濟門外爲南北渡江要津
又東門外有宜城鎮

呂蒙城在府東二里臨江相傳呂蒙所築今爲故倉地
縱陽城在桐城縣東南一百二十里左傳文公十二年

江南通志

卷三十四

輿地志

古蹟

一

安慶府

淺草文庫

楚子孔執舒子及宗子遂圍巢杜註宗國名羣舒之屬
卽樅陽也漢置縣晉陶侃傳云初領樅陽令而志無此
縣蓋嘗復此而尋廢也梁復置樅陽郡今有樅陽上下
鎮

魯鎮城在桐城縣南七十里吳魯肅屯兵於此

呂蒙城在桐城縣東南相傳呂蒙所築按此非府城東
之呂蒙城也

同安城在桐城縣東門外隋大業九年築

山城一名山焦城在桐城縣東南卽唐移置同安縣處
地多猛虎毒蛇元和中縣令韓震焚薙草木其害遂除
連城在桐城縣東南一百二十里唐書張儉傳儉祖威

封皖郡父植封連城卽此

六兒城在桐城縣南十五里明初黃榮六所築

孔城在桐城縣東三十里宋史李顯忠傳顯忠破敵於
孔城卽此

懷寧故城今潛山縣治古皖國晉置懷寧縣

安樂故城在潛山縣南二十里唐置於古武功城內武
功城梁天監時大將武會所築也

梅城故城在潛山縣北唐置於龍鳴城內龍鳴城齊天
統三年行臺右丞盧潛屯兵所築時龍鳴城中移軍在
外因號龍鳴城

皖陽故城在潛山縣北二十二里其城居皖水之北故

名

連塘城在望江縣茗山下委土為塹周二里四門相傳
劉裕與盧循戰處遺壘尚存

古桐國在桐城縣北左傳云定公二年桐叛楚杜註曰
桐小國世屬於楚舒縣西南有桐鄉是

陰安廢縣在桐城縣東南八十里本漢魏郡屬縣劉宋
時僑置於此

呂亭廢縣在桐城縣東北劉宋時以豫部蠻民與太湖
縣同置今置驛

皖城故縣在潛山縣北唐武德五年析懷寧縣置皖城
安樂梅城皖陽四縣按皖陽故縣府志云今之山口鎮

卽舊皖陽也

太湖廢縣在太湖縣東北二里卽今東嶽廟劉宋初置
在龍山太湖水之側元嘉末移就平原去舊縣三十八
里

東陳廢縣在太湖縣東四十里北齊置

青城廢縣在太湖縣東四十里魏曹仁所築唐武德四
年置縣於此今名上格城

荊陽廢縣在太湖縣東四十五里唐武德間置

松滋廢縣在宿松縣北五十里漢始元五年封六安共
王子霸為松滋侯國於此

雨社在宿松縣西十里漢縣令張何丹禱雨處

同安監在潛山縣東八十里熙寧八年置鑄錢

正氣樓在府正觀門外余忠宣闕廟左山阜

四望樓在府治東登眺四望江山風景舉在目中

中江樓在府鎮海門外江滸

天柱閣在舊郡圃久廢明郡守胡纘宗創建於正觀門

外江滸登閣西望天柱巋然

太子閣在潛山縣天柱寺相傳昭明讀書處

潛峯閣在潛山縣境內王安石通判時讀書處

擢秀閣在潛山縣北五里宋陳瑩中嘗於此讀書後擢

第黃庭堅因以擢秀名閣

天開圖畫亭在府學後枕山面江為郡佳勝元余闕有

詩

紫玻瓈亭在府城雙蓮寺後明劉若宰讀書處夢神以

紫玻瓈授之因以名亭

惜陰亭在桐城縣樅陽鎮陶侃為樅陽令曰大禹惜寸

陰我輩當惜分陰故名

達觀亭在桐城縣樅陽鎮宋黃庭堅讀書於此

石亭在潛山縣東北三國志云魏揚州牧曹休侵皖吳

將陸遜等敗休於石亭是也

涪翁亭在潛山縣山谷寺中以黃庭堅得名又有涪翁

書臺

止泓亭在太湖縣白雲山海會寺宋嘉定趙容之勅明

嘉靖二年寺僧得石刻曰止泓復建此亭

對酌亭在宿松縣南臺山李白與閻邱舉杯邀月處又清風亭在縣東郭外三里李白贈閻邱詩有一朝風化清之句因以名之

廉泉亭在望江縣西四十里廉泉之上

超然臺在府治東北雙蓮寺右元虞集有詩

射蛟臺在桐城縣樅陽鎮漢書紀云武帝南巡登天柱山自潯陽浮江射蛟江中獲之薄樅陽而出作盛唐樅陽之歌

祭臺在潛山縣皖山麓漢武帝祭嶽處

仙人臺在潛山縣白鹿巖東北廣五丈上有仙人足跡

又有一臺在金鍾潭上

舒王臺在潛山縣治南宋王安石讀書處安石後封舒王因以名臺

天樂臺在潛山縣明劉若實渡石梁踞天池鼓琴聞空中奏天樂有異禽千數從天柱飛來音同笙磬

煉丹臺在太湖縣香茗山晉梅福煉丹於此

焚身臺在太湖縣登明山僧法寶禱雨不應遂焚身卽得雨嘗有燈光見其處

分經臺在宿松縣北五十里有石高百餘丈梁昭明太子分金剛經於此宋嘉泰間建法華亭

讀書臺在宿松縣南三里唐李白至宿松依邑宰閻邱

江南通志 卷三十四 五
築臺讀書於此

釣魚臺在宿松縣陳漢山溪傍相傳張果老垂釣於此
三至堂在府治東宋元豐間楊希元建其祖淳化中守
皖父天聖中爲通判至希元凡三至郡故名

大節堂卽今府堂元郡守韓建拒盜保城余闕作大節
堂記

九帶堂在桐城縣浮山會勝巖上宋僧法遠垂帶示衆
處

靜山堂在潛山治內舊郡堂也宋王安石詩皖城終歲
靜於山因名

雲會堂在潛山縣真源宮宋寧宗慶元五年建

左真人仙堂在潛山縣真源宮唐寶曆二年建開成五
年張虛白撰記

二祖禪堂在太湖縣與司空山近

太白讀書堂在望江縣西十八里值雪山李白避地于
匡廬司空問往來雷池值雪因築室讀書今遺址尚存
三孝堂在望江縣治北元至正中建爲孟宗王祥徐仲
源也後改爲祠

二良書院在府治東爲文翁朱邑建

禹江書院在宿松縣治西明郡守李遜講學處

慈湖書院在望江縣慈湖坂元王幼學讀書講道於此
著有綱目集覽別號慈湖

蓮花書院在望江縣小茗山漢梅福曾避地於此至唐羅隱復來居之洞竈遺址尚存

喬家故井在潛山縣彰法山麓漢末喬公居此二女皆國色孫策克皖娶大喬周瑜娶小喬二女以殘脂粉投井中至今井水有脂粉色

孟宗宅在望江縣西北卽泣竹生笋處又有泣竹臺在城內三孝祠後

西溪館在潛山縣城西唐刺史呂渭喜舒州山水於城西設館覽一州之勝

英輔齋在潛山縣太平寺東宋王珪讀書處
萬松山房在府西門外宋馮京讀書處

青山石屋在桐城縣城中晉裴仙人修煉處

龍眠山莊在桐城縣龍眠山宋李公麟居此嘗自繪山莊圖蘇轍有龍眠山二十詠山側為

國朝大學士張英賜金園

松壑別墅在潛山縣撥蒿坂宋處士金良貴棲隱之所
白雲舊里在府城正觀門外宋白雲守端禪師於此悟道

昭賢里在望江縣北八里唐徐仲源事母以孝聞母卒遇雷雨輒伏墓側呼號德宗勅號所居里曰昭賢鄉曰孝感於墓傍築孝義墩白華軒今墩尚存

順孫里在望江縣涼泉明嘉靖間龍涌事祖母以孝聞

詔樹慈順坊於其里故名

子貢嶺在府西五十里子貢遊楚停驂於此

逢龍山在府西北余闕讌董僉憲詩所云雁沒逢龍山

是也三國志臧霸傳云吳將韓當逆霸霸與戰於逢龍

山還屯舒郎此

晉陵坂在府大豐鄉獨山之下有大阜隱隆若釜卽陵

也不知何代嘗有人開田見石門遂止旁壘壘者皆疑

塚

長風沙在府東六十里卽李白長干行內所指也亦名

長風城齊吳子陽與豫州刺史戰於此宋周湛充江淮

制置使謂長風沙最險者石牌灣鑿河十里避之

皖口在府西唐李涉遇盜投詩處

將軍冲在府北門外元余闕引江水通五濠三塹屯兵

於此以拒僞漢

藤墩在府東城內舊有大樹覆墩垂藤如織

石牛洞在潛山縣山谷寺西大石如牛眠旁有蹄跡黃

庭堅嘗讀書石上李公麟爲之繪圖又有石牛精舍在

山谷寺中

酒島在潛山縣山谷寺前有石島色殷紅如赤玉清流

映徹光彩絢爛如霞潛山十景之最也

鱸溪在潛山縣吳塘魏武帝行軍至潛忽思鱸膾左慈

取銅盤釣之得數十尾武帝釋其半於溪時正暮春今

惟柳絮飛時有之謂之楊花鱖

大雷戍卽今望江縣治晉時置陳爲大雷郡隋改今名盡忠池在府西門外卽清水塘元余闕死此

雲池在潛山縣真源宮東池中嘗起五色雲

卧冰池在望江縣埠南岸相傳晉王祥避地時卧冰於此後雖寒亘不冰

木鷺洲去桐城縣百二十里南唐與周世宗割江爲界以木鷺浮江中隨所之以定南北鷺乃循洲入小峽而下

六百丈在桐城縣東二百里樊若水乘小舟載絲繩以度江之廣狹此處闊六百丈云

令公潭在潛山縣東門漢末邴令公與妻陸氏同死難於此

桃花潭在宿松縣城西上河口

龍潭在望江縣南二里卽唐鞠信陵沉石禱雨處

釣魚磯在太湖縣龍山崖下水中有石刻磨滅不可盡辨中有云波光映照影肝膽寒嵐氣逼人毛髮立府志云邑人以沙水洗苔蘚知爲倪德元作

仙田在宿松縣北卽西漢松滋縣治匡阜真人修煉於此後張何丹爲令時有嘉禾無種自生故名風節井在府城按察使署後余闕妻盡節於此

天泉井在桐城縣南城內明末流寇圍城城中渴甚有

小兒戲掘一井泉忽大湧因連掘十餘穴穴皆湧泉全城賴以存活

夢井在潛山縣真源宮前唐明皇嘗夢遊此因賜名中使王越賓題詩有馮誰借問宮前叟曾托吾皇一夢來之句

西源九井在宿松縣西源山自麓至巔九井如貫惟第七井在山半峭壁旱時捫蘿而上得水急返雨輒至讓泉在府西門外泉極清冽汲者爭則竭讓則涌

錫泉在潛山縣梁寶誌公卓錫得泉處

鶴泉在潛山縣白鶴道人止處鶴起泉流

山谷流泉在潛山縣山谷寺佛殿後有黃庭堅題額始為流泉後以石甃周圍澄泓不流名曰摩圍泉庭堅最愛飲之遂自號摩圍老人

雙螭泉在潛山縣西北皖山頂明慈禪師所住庵掘地見雙螭躍出泉輒湧

望湖石在桐城縣西門外黃庭堅讀書處

詩崖石在潛山縣吳塘水南水激石如漱玉十景之一也

碁盤石在太湖縣良埠灣梅福與仙奕此石上

傳衣石在太湖縣司空山二祖慧可傳衣與三祖處又有葫蘆石相傳二祖祕記存焉

憇錫石在宿松縣西南五里佛坐嶺五祖偶坐此欲卓

錫於此聞龍湖水腥吟曰生平不愛魚池水風動波聲也帶腥遂飛錫去又且記石在嚴恭山五祖愛其幽勝欲建道場於此良久曰此處有千年山而無千年水乃抱一巨石置之曰且記此

石鏡在府城西北懸石丈餘光明如鑑

鐵牛在府城江濱多水怪初建城時冶鐵鎮五處集賢門內一盛唐門內一山川壇東一天柱閣右一萬億倉一時有聞喘聲者驚其異稱為鐵牛大將軍

飛來鐘在府雙蓮寺有大鐘浮江而下寺僧迎之遂止六鐘宋文帝元嘉七年帝將征關洛潛山有鐘十二聲發地中山崩六鐘自出制合古式聲中律呂上有古文

一百六十字

鶴駕在潛山縣城外宋元豐間每歲仲春有鶴數千羣蔽天而來回翔飛舞於空張春遊潛見之作鶴駕詞

徽州府

毛甘故城在歙縣烏聊山後漢末毛甘萬戶屯於此吳將賀齊平之

徽州新城在今府城溪北三里宋宣和三年築新城於此因民不便仍還舊城即今府治南畿志云今故址盡為民居

故城門在休寧縣有六府志云東迎春在淳化巷首西忠孝在惠政橋南班政在古樓巷北松蘿在鶴山巷北

東南救寧西南美俗遺址尚存

婺源故城在婺源縣北二十五里唐開元中分休寧縣置中和二年楊行密將陶雅守歙暴橫縣人汪武據莛高鎮以拒之後縣治因而不改卽今治也其故城改爲清化鎮

梅銅城在祁門縣西十五里銅吳芮將項羽封銅十萬戶侯邑於此

廣德故城在黟縣東漢置寰宇記云有舊城在今縣東五里

越國公城在績溪縣登源唐初汪華起義時築此

歸德廢縣在歙縣西南五十里唐永泰五年析置按唐志在休寧而寰宇記在歙境相接也

海陽廢縣舊治休寧縣西二里靈鳥山尋移治縣東十三里萬安山上本歙縣地孫吳析置休陽縣後改海陽府志云萬安山下有兩村曰上舊市下舊市

國朝改市爲墅知府陳玉題上舊墅曰海陽故址

黎陽廢縣在休寧縣西北晉置今爲黎陽鄉

祁門故址在今祁門縣西元和志云縣東至歙州一百七十九里本古昌門地漢黟縣之南境唐永泰元年方清於此僞置昌門縣刺史長孫全緒討平之耻其舊號以縣東北二里有祁山因改祁門

梁安縣卽今績溪縣梁大同初析歙縣置今縣南有良

安鄉蓋梁安之訛也

貢院在府城府志云宋乾道四年於大成殿東因餘地而益拓之設貢院選士明年登第者十人內有爲禮部第一廷試第三者

越國公府在休寧縣萬安山舊稱汪王故宮汪華所居宋爲廣惠王廟

紫翠樓在府治宋宣和間建

御書樓在府槐塘宋丞相程元鳳建

梅花初月樓在府石門明學士朱升建太祖御書梅花初月四字顏之

羅穎樓在府西新安山水志云樓跨黃羅天馬間樓前

小山外見黃羅如錐穎露秀刺天際天馬蜿蜒右翼彷彿百雉翠光冉冉撲樓中兩山如在几席間也

溪山第一樓在婺源縣城中羣山環其前大溪走其下

元馬肅建程文記

望鳥樓在祁門縣二都唐郎中廖嵩自閩避亂來祁攜二鳥卜居至此鳥棲不去遂家焉其裔孫德湊爲建望鳥樓

擁青樓在祁門縣治宋景定中建以杜甫高山擁縣青句爲名

廬直樓在祁門縣桃峯下宋謝昇建其子璉講學其中種竹十竿故名

雪峯樓在績溪縣西石壁山上宋崔鷗建

景蘇樓在績溪縣署舊爲秋風堂宋紹興間邑宰曹訓
摹前令蘇轍遺像及所爲詩鐫於石建樓貯之曰景蘇

宸奎閣在府城紫陽書院內因宋理宗御書建閣

春草閣在府松明山明汪道昆讀書處

侯賢亭在府間政山唐刺史于德晦爲兄方外建

披雲亭在府南山唐宣歙副使魏弘簡建見柳子文集
及文苑英華

歲寒亭在歙縣治舊名松風亭宋令王薦建府志云元
紫陽書院山長張炳購於趙評事家得其地以歸學明
正統間立亭

浮邱亭在郡治西北雉堞上有兩古木宋邵守洪适倚
木建亭范成大有詩又浮邱園在浮邱山下古梅十里

許

秋水亭在休寧縣治宋令葛勝仲濬深池築亭其中府
志云

國朝縣令廖騰燧重建加廣焉又縣治西有真意亭亦葛所
建

還金亭在休寧縣霞阜河畔爲商山吳清還金建有碑
記

環綠亭在婺源縣儒學山右宋汪子英建元胡炳文記
流芳亭在婺源縣西二十里宋江大正建

時雨亭在婺源縣石龜潭上元達魯花赤納懷禱雨輒應因建此亭自爲記

翠眉亭在績溪縣西亭前小山相對如眉宋蘇轍嘗遊焉謂似其鄉之眉山故名後卽亭爲蘇轍祠

豁然亭在績溪縣治宋汪琛建蘇轍有詩

世德亭在績溪縣南邑人爲明尚書胡松建

孝感亭在績溪縣治北明縣令高梁爲孝子許欽建

鼓吹臺在府篁墩湖側程篁墩記云忠壯公靈洗習戰時所築數傳後風雨之夕猶聞鼓吹聲

百花臺在府西三里宋司農汪叔詹築

富登釣臺在府富登渡一石出江上勢欲飛入江中元

鄭玉嘗釣於此平章余闕篆書鄭公釣臺四字於石玉自爲記

李白釣臺在黟縣東南十六里西連墨嶺一名尋陽臺

黃山堂在府治後唐大中初建舊有黃山樓北望天都

蓮花諸峯森秀天表後爲堂于德晦有詩

舍蓋堂在府治後宋洪适建以延四方往來之士范成大記

相儒堂在府城南門內宋程元鳳讀書處寶祐中州守趙汝嶧建府志云後廢碑刻移砌大成殿牆左

中山書堂在祁門縣南元汪克寬與弟時中肄業之所程忠壯宅在府西三十里仁愛鄉宅有大樹號千年木

立祠其下篁墩湖濱礫石尚存為一方勝蹟

黃孝子宅在府西九里黃屯園唐孝子黃芑故居貞元
中詔旌其門今稱孝仁里

汪莘故宅在休寧縣西門內柳塘坊

凌唐佐宅在休寧縣救寧門南凌家巷

共學齋在休寧縣東山元儒趙汭講學所

尊德性齋在婺源縣環溪宋程洵建初名道問學朱子
易之復為銘

屏山書屋在婺源縣翠屏山朱子歸省祖墓時所建十
世孫穩復結屋讀書於此

環佩重來軒在府之槐里宋丞相程元鳳有琴曰環佩
亡去已久其六世孫文貫復購得之為軒以藏焉

風泉雲壑軒在府南門紫陽書院宋郡守韓補建元方

回記

新安道院在休寧縣治東宋令祝禹圭建 附朱熹記

大夫信安祝侯汝玉以書來曰休寧之為邑雖有難治
之名而吾之為之已再歲矣始也不能不以人言為慮
中乃意其不然而今則遂有以信其果不然也蓋其封
域實鄣山之左麓而浙江出焉山峭厲而水清激故稟
其氣食其土以有生者其情性習尚不能不過剛而喜
鬪然而君子則務以其剛為高行奇節而尤以不義為
羞故其俗難以力服而易以理勝苟吾之所為者出於
公論之所是則雖或拂於其私而卒不敢以為非也以
是吾之始至蓋不能無不說者而今則靡然無與為異
吾常困於事之不勝其繁而今則廓然無事之可為也
吾將更葺廳事之東參采賓佐屬詠之什而榜之以新
安道院子能為我記之則後之君子益知所以為治而
無吾始者之慮矣予惟汝玉之為此可以見其政之成
民之服而官曹之無事矣然道之得名正以人所共由

之路而非無事之謂也夫以汝王之始至坐於堂皇之上則左簿書右法律日夜苦心勞力而不得休其或不暇則又不免衝寒風冒烈日以出入乎阡陌之中而不敢怠凡所以勸民之善而懲其惡與民之利而除其害者非有道以行之則何以致今日之無事哉顧其名此耶抑常計之天下之事雖有動靜勞逸之殊而所謂道者則無彼此精粗之間汝玉之學固以知此矣彼其所以喜於政成之無事而不避異學之淫名豈非朝夕之間猶欲從容於此以深思前日之已行而益求其所未至卒以究夫無彼此精粗之間者而大發於功名事業之間乎予故邦人且汝玉予舊也樂其意為書本末以示來者使於此邦之俗賢宰之志尚有考云

新城園唐咸通六年於歙州城西北為堤以禦水光化中增築為新城其後堤漸圯每為溪水泛溢因棄為桑野名曰新城園

朱家巷在府西南黃墩朱子自叙茶院譜後云先世居

歙之黃墩附朱熹婺源茶院朱氏世譜序熹聞之先君子大史吏部

府君曰吾家先世居歙州歙縣之黃墩相傳望出吳郡秋祭率用魚鼈唐天祐中陶雅為歙州刺史初克婺源乃命吾祖領兵三千戍之是為制置茶院府君卒葬連同子孫因家焉生三子事南唐補常侍丞其後亦有散居他郡者熹按今連同別有朱氏舊不通譜近年乃有自言為茶院昆弟之後者猶有南唐補牒亦當時鎮成將校也蓋其是非不可攷矣先吏部於茶院為八世孫宣和中始宮建之政和而葬承事府君於其邑遂為建人於今六十年而熹抱孫焉則居閩四世矣淳熙丙申熹還故里將展連同之墓則與方夫人十五公馮夫人之墓皆已失之因亟詢訪得連同兆域所在乃率族人墓於有司而後得之其文據藏於家副在族弟然而三墓者則遂不可復見癸卯五月辛卯因閩舊譜感世次之易遠骨肉之易疎而墳墓之不易保也乃更為序次定為婺源茶院朱氏世譜而并書其後如此仍錄一通以示族人十一世以下來者未艾徽建二族自今每歲當以新收名數更相告語而附益之庶千里之外兩書如一傳之永遠有以不忘宗族之誼至於盧村府君其墓益遠居故里者尤當以時相率展省更力求訪三墓所在而表識之以塞子孫之責而熹之曾大父王橋府

君無他子其墓在故里者恃有薄田於其下得以奉守不廢當質諸有司以為祭田使後之子孫雖貧無得鬻云

五城務在休寧縣南五城水上舊為大鎮有五城斜隅

相對旁有大墳有人發之其墳上鐵厚二尺鐵纜破雷

雨晦冥人懼而止元置五城務明初廢

吳山里在婺源縣東七十五里勾踐滅吳流夫差二子

其長子鴻死此因葬焉遂名吳山里又名婺女里

朱文公闕里在婺源縣南朱子先世故居元時知州干

文傳建朱子家廟中有韋齋井相傳文公生時井中紫

氣現亦曰虹井明宣德中建亭其上 附明汪敬虹井亭

記虹井亭者記闕里虹井亭也記井甃自開邑而有虹則自朱晦菴父子始自并有虹而婺之文明闢豈惟

婺之文明闢宇宙之文明實闢今之宇宙揭聖經於中天而雲漢為昭者誰之功與語有之天降時雨山川出雲夫雨也而雲先則文明也而虹兆理又奚疑哉考之古尼父制孝經既成而告備於北斗有赤虹自天而下化為黃玉尼父拜而受之夫孝經何與於北斗而天之降精若是其與春秋成而麟出同一微應乃或者謂麟出為非時故仲尼春秋成而麟出同一微應乃或者謂麟不行之兆因之絕二百四十二年之筆獨胡氏以河出圖洛出書及簫韶作而鳳凰儀當之謂其先後天弗違其說始章明而有據正大而非誇彼欲逃之乎徵應之說者蓋皆求其故而不得者也若然則一聖一賢其生關乎天地其立言也關乎禮祥母惑乎集大成者先後若同堂也井在故宅之右氣潛與龍井相通可供千家之汲寒冽冰齒人多啜不噎又能已疾龍井之間龍嘗嘯氣盤結如雲其深不可測此則垂綆不踰二仞往來井井其坎常盈自虹出而泉日減蓋精騰於天而氣竭於地理無足怪然人不敢以為舊為泥棄之必曰此瑞井也宣德九年錢塘侯以仲尼之後一人因用其學為晉謁闕里拜瞻遺像以為修學宮葺書閣文公之祠因次政政成而百廢具舉修學宮葺書閣文公之祠因次及圯者修之敬者指之朽者新之徘徊於虹井之上懼其久而汚也為亭以覆護以甃垣平以文石垣為四戶

限其流之旁入者俾汚潔屏而寒泉注顏其楮曰虹井
亭人之過而瞻者於以知晦翁之上應天精下稟地靈
而侯且命敬曰子盍為記之使後人葺俾勿壞敬因復
曰睢渙之水錯繡若麗壺頭之泉淑蘭成氣漱英噴華
呈祥表異聖道汪洋如水行地前有河洛後有洙泗淵
淵虹泉同源共瀆我侯濬之澤存萬世侯曰其然庶無
甕敝乃礪貞石而刻之


僕城里在黟縣西十八里林歷山下漢末陳僕等屯此
故名

孔靈村在府南三十里晉永嘉之世孔愉避地居此信
著鄉里後忽捨去人皆以為神人
任公村在府北四十里梁太守任昉行春至富資溪上
樂之徘徊累日人號其溪曰昉溪溪傍村曰昉村唐大
中初刺史盧潘易曰任公村

舒村在府西四十里中鵠鄉村旁有讀書墩南唐進士
舒雅所居府志云隔溪山石望之峩然若纓其冠者曰
幞頭石

斷石村在休寧縣西南三里懸厓絕壁巨石墜下如臺
狀宋治平中知縣事呂大防書斷石二字於上今稱落
星臺祥符經云昔有兩舟泊崑下一祭一否石隕不祭
者舟

張村在祁門縣西十里唐左金吾大將軍金華張志和
隱此自號烟波釣徒因名
大徽村在績溪縣改州為徽取此
漢洞在府仁愛鄉外狹中寬有爨日遺跡相傳漢末郡



人避兵於此

仙巖在婺源縣壁月門外相傳宋時有人掛竹連環於杖頭至巖倏不見始悟竹環爲呂字且其貌與洞賓類遂塑像建觀祀之

譙貴谷在黟縣輿地紀勝云在縣南方輿勝覽謂在縣北昔土人入山行七日至一穴豁然周三十里中有十餘家又云按縣圖有潛村至今數十家同一村或謂之小桃源三說不同放生池在府城西宋紹興十三年詔天下郡各爲池放生於是鑿城西墺地以應詔後郡守童僮增廣之作恩波堂及好生魚樂之亭

萬貫洲在婺源縣鵲溪宋岳飛征楊么屯兵於此

朱塘在婺源縣東朱子還婺源與門人滕璘遊見其山水幽靜俱如疇昔夢中所見問其地對曰朱緋塘璘世業也朱子曰故與子有神交者在因命作亭爲書草堂二字貽之

五畚驛在休寧縣南二十五里又縣南二十九里有皇華驛原名憇賢驛俱元置明初廢

魚亭驛在黟縣東三十五里宋置呂本中詩云竹密如雲不見天好山無數簇溪田只應黟縣溪山勝盡在魚亭驛舍前

衝山營在婺源縣治西北五代時吳將劉津所置今有

壁壘餘址

胡僕射營在祁門縣義城都福州及歸仁都等處皆唐末胡瞳屯軍之所

管界寨在府西百八十里又深渡寨在府南四十五里俱宋置明初嘗置巡司

程灃寨在休寧縣南東密嶺唐乾符五年黃巢寇郡郡人程灃率義兵立寨於此以拒之今塹壘猶在相傳上有元帥府基下有落箭邱皆以灃得名

舉嶺寨在休寧縣東北十五里天寶岩又縣東南方山有白際嶺寨縣西婺源界有塔嶺寨又縣西吳田嶺上有馬金寨縣西南溪口有松陽寨皆宋置元廢

中平寨在婺源縣東九十里宋置明初廢今爲往來孔道

西坑寨在績溪縣東六十里元置又置鎮守軍營於此明初改置巡司戍守正統初廢

蝦蟆坑在府鎮安門外俗訛爲麻坑

階坑在府東北二十里方輿志云吳廢太子和所居階迹猶存

浣沙埠在府龍井山北相傳李白訪許宣平至埠上一翁對曰門前一竿竹便是許公家白悵望翁已失所在蓋翁卽宣平也

石羊阡在休寧縣東鄉吳王楊行密疑塚也南畿志云

世傳吳太子葬東山今不知所在惟兩石羊夾道有翁仲石趺存

獨母柴在黟縣南十五里俗傳昔有寡婦死無以葬行人覆之以薪至今人經行其處皆以一枝草投之

殷公井在府南羅城內井底有斜穴一通銅井潭一通釜井潭每井有遺物多於二潭得之

少保井在府城內唐少保薛稷所鑿明一統志云一名九井

唐均勝井在黟縣東二十五里天井山麓歲旱禱雨俄而滿井霖雨隨注

聖泉在休寧縣蓀田葉巖下相傳明高帝訪汪巽元馬蹏所觸遂成泉


兌卦石在休寧縣古城山麓宋淳熙間縣令鄒補之摩崖隸書兌卦於其上

產龍石在黟縣東山石燕洞之下其石劃然兩開各有首尾鱗爪相傳龍孕石中石破而龍出

白玉大士在黟縣石門山洞石如玉肖觀音大士像慈孝松在府龍山元至元丙子鮑宗巖遇盜縛大松下

其子壽孫願身代不聽倏烈風震變盜恐軼去得免明承樂中旌其村為慈孝里松曰慈孝松

楠樹在休寧縣西白嶽山大數十圍諸石如伏犀馴象山志云江左楠木惟此一株今枯雕為神像



寧國府

楚王城府志云在城北百里黃池鎮南相傳吳楚相距時築又有故楚城在南湖北岸

遂道城府志云在城北四十里南畿志云在府東北六十里本漢縣屬九江郡晉末僑立於蕪湖縣界屬淮南郡

溫城在府東二十里唐刺史溫章築

宣城故城在南陵縣東四十里青弋江上漢縣屬丹陽郡建安二十年孫權使蔣欽屯宣城即故城也

甘公城在南陵縣北七里或曰吳將甘寧嘗屯此或曰晉內史甘卓治郡時築俗訛為甘羅城

南陵故城在南陵縣西北梁置南陵縣治赭圻城赭圻城互

見太平府

吳故城在涇縣西南五十里落星潭東俗稱沙城宋志云三國吳置水經注云晉太康元年分宛陵置今有安吳市及安吳渡

桓公城舊通志云在涇縣東四十里烏溪嶺南畿志云在桓公嶺下晉桓彝討蘇峻築此

走馬城在涇縣南四十里晉桓彝將俞縱屯兵處又有蘭石在縣東六十里桓公嶺西桓彝使俞縱守蘭石即此

白龜城在涇縣東北柏山下隋末左難當欲築城拒輔

公祐會溽暑大雪有白龜印雪周行隨跡築城故名又有幙山軍壘在縣東北三里亦難當拒公祐所築

猷州城在涇縣西三十里大寧山前唐武德間置明一統志載入石埭以晉時兩縣俱隸宣城郡也

寧國故城在今寧國縣南十三里三國吳置

懷安城在寧國縣東南百里明一統志謂縣南四十里誤吳大帝分宛陵置

烏石城在寧國縣南九十里盤山北相傳南唐時置以備吳越

丹陽郡治漢宛陵縣卽今宣城縣其城晉內史桓彝所築今府治東北有鐵牛門卽彝所築子城故址也

南陽廢縣在旌德縣西北梁置屬宣城郡

仙壇在宣城縣麻姑山最高峯舊有丹竈劍池石碁枰釣魚磯天游亭諸勝跡世傳麻姑煉丹處

雙鯉塔在太平縣西九十里弦歌鄉高可丈許搖之輒動終不仆下臨大溪溪有二石狀如鯉與水浮沉雖漲不沒故名

北樓在府治北南齊宣城守謝朓建唐李白詩誰念北樓上臨風懷謝公亦名謝公樓明郡守方逢時記云自

唐獨孤霖改建疊嶂樓而北樓之名廢矣附宋田錫疊

嶂樓賦宛陵之邱元暉舊遊城連延兮百雉世綿歷兮

千秋流水白雲慨依然而在覽遺風往事信赫若兮長留余以丹陛策名皇華奉使適蒞於此乘春以至驛梅江柳動遊宦之芳懷風觀露臺起高明之逸意

疊嶂居先登之悅焉憑落絮之危檻向飛花之晚天復
嶺連岡峙昭亭兮作鎮平蕪遠樹引句水兮為川因而
攬古興懷臨高凝睇自春秋戰國之後至吳魏鼎分之
際干戈僭王乘輿擬帝斯為形勝之地恃以控臨之勢
襟帶三江咽喉五湖歸勺踐兮稱越隸夫差兮曰吳比
奕棋之靡定惟霸畧兮能圖方今禹迹重新堯封復古
銜玉命於北闕詠皇風於南浦升高而賦憐宋王之才
多覽景自怡非仲宣之思苦江渺渺兮涵春草萋萋兮
感人指吳越之遠道介池歎兮為鄰兩漿何歸引迴眸
於天際微雲似畫帶斜陽於水濱既而閱謝守之詩蒼
苔滿石覽獨孤之文芳塵在壁杏花含露念昔我之來
時菊蕊迎霜乃今余之暇日歲云豐稔民之悅逸思命
儔兮嘯侶聊登樓兮自適

忠勤樓在府南門宕吳氏村口宋景定間吳淵置樓於
丞相第中御書忠勤樓三字額賜之今祀吳柔勝吳淵
吳潛三公於其上府志云明萬曆初改建

雲齊閣在府敬亭山翠雲庵前取唐李白詩合沓與雲
齊為名府志云

國朝郡守龔鯤重建

雙溪閣在府治後與疊嶂樓並宋治平中刁約建即唐
初北望迎春閣故址文天祥有登雙溪閣詩
識松閣在府城東舊府學中初相地者云百年後松梢
過閣當有魁天下者至嘉定間吳潛果大魁因以名閣
風光閣在涇縣西賞溪上舊有亭宋紹興中縣令魏杞
改建閣取風光水西之句名之後為水嚙移縣治左
敬亭在府北十里敬亭山
謝公亭在府北郭外即謝朓送范雲之零陵處唐李白
謝公亭詩謝公離別處風景每生愁

擁翠亭在府城北敬亭山即李白獨坐題詩處遺碣尚

存

西候亭府志云未詳何地南畿志謂在府西郭外宣城

事函云唐天寶中宣州刺史趙悅建附唐李白西候亭

序惟十有四載皇帝以歲之驕陽秋五不稔乃慎擇明

作藩於宛陵祇明命也惟公代秉天憲作程南臺洪柯

大本聿生懿碩宜乎哉橫風霜之秀氣鬱王霸之奇畧

初以鐵冠白筆佐我燕京威雄振肅敵不敢視而後鳴

琴二邦天下取則起草三省朝端有聲天子識面宰衡

動聽殷南山之雷剖赤縣之劇強項不屈三州所居大

化咸列碑頌至於是邦也酌古以訓俗宣風以布和平

心理人兵鎮惟靜畫一千里時無莠言退公之暇清眺

原隰以此郡東塹巨海西襟長江明三吳扼五嶺輪軒

錯出無旬時而息焉出白西郭蒼然古道道寬列樹行

無清陰至有疾雷破山狂飈震壑炎則燥野秋霖灌途

馬虺隤於谷口人周章於山頂亭候靡設逢迎闕如自

唐有天下作牧百數因循離礙罔恢永圖及公來思大

革前弊實相此土陟降觀之壯其迴岡龍盤杏嶺波起

聲勢交至可以有作方農之隙廓如是營遂鐘崖堙卑

驅石剪棘削污壤皆高閣以門以墉乃棟乃宇儉則不

陋麗而不奢森沉閑闕燥濕有庇若鼇之湧如鵬斯驚

縈流鏡轉涵映池底納遠海之餘清瀉蓮峯之積翠信

一方雄勝之郊五馬踟蹰之地也長史齊公光又人倫

之師表司馬武公幼成衣冠之髦彥錄事參軍吳鎮宣

城令崔欽令德之後良材間生縱風教之樂地出人倫


響山亭在府城東南二里唐刺史路應跨潭為梁建兩

亭於東西崖權德輿為記鐫崖石附權德輿記元和二

月宣城長帥中執法襄陽郡王路公作新亭新營凡周

月而厥功成先是郡城之南扼漚澆礪山木不剪樵門

寧國府



不開公因暇日觀視原野直南一里所得響山焉兩崖聳峙蒼翠對起其南得響潭焉清泚可鑿際迴澄淡又其南則博敞平夷瀟漫逶迤從古之隙地是邦之休利目與心會闡然自得述以條陳實蒙報可乃量日力計徒庸闢於舛中成是夷道揭東西二亭於雙峯之上相距百步華軒峻宇皆據勝勢廣廈疏寮可棲灑氣碧山亘目清流在下跨以虹梁抵茲近郊因其爽塏乃列營署度野以步度堂以筵上棟下宇各有區處規地之廣袤分左右營部焉牙門新軍而下左至八右至七既而左次莽平采石之師與宴設堂又在廣場閱館竄篠縈帶可以閱軍實可以容宴豆度羹材則不費因悅使則不勞巽之申命師之畜衆楚莊之飽居衛文之楚邱得其時制而不煩也官業盡在於是爰初師所處在郡之北偏地泐塾下水泉沮洳積弊不遷介大病焉至是則修武備建長利興寢得安其室處坐起以觀其習變而公又饗士於斯娛賓於斯公之心大則神王神王則中和旁達士體寧則氣全氣全則餘勇可賈夫然則不出楹階俎豆之間而威儀交修上下浹洽在此物也以公之平粹淑均天資吏師昔嘗四部符一司武皆有利澤施於州壤及是則貴為元侯疏以大封推心術而行千里所繇屬城而流於支郡程功底績觀發知智亭與營之制宜乎哉前賢之以循政聞者有矣而遺於是豈溪

公之為而裕斯人也凡由此塗出者東南抵於歙西南抵於涇肩摩轂擊往復自便絕東谿有浮橋過西亭得蓮池觸類滋長皆為絕境公以鄙夫春秋之徒也繪而傳焉使實錄於石

沃洲亭在府城東十里玉山寺後宋時建取唐李白五

松何清幽勝景美沃洲之句

環波亭在府城北濠上宋郡守邵飭命名梅堯臣有詩

景梅亭在府城南宋梅堯臣祠墓之左府志云知府范

吉建

東峯亭在涇縣西劉遺民釣臺之側唐永泰中李廣琛討洞寇方清宴容於亭上適告捷御史中丞袁修賦詩刻石紀其事後裴丹於荆棘中得斷碑有袁修二字因名其石為袁石

烟雨亭在涇縣西寶勝寺前枕山面溪烟雲如畫

六勸亭在太平縣南五里宋令周景賢以六事勸民

嚴公臺在府西南四里相傳漢嚴光嘗垂釣於此宋梅

堯臣詩有卜經嚴子臺句

劉遺民釣臺在涇縣水西寺左白雲潭上遺民嘗爲柴

桑令後棄官釣魚於此有石巋然下臨潭水

琴高臺在涇縣北二十里琴溪高山之巔按列仙傳琴

高在涿水此蘇耽也以其好鼓琴故以琴高名之

望霞臺在寧國縣西溪唐貞觀初建

歃血臺在旌德縣石柱山梁時程靈洗起兵討侯景築

壇誓師於其上

海榴堂在府治唐時建許渾有陪崔尚書宴海榴堂詩

萬卷堂在寧國縣南屏山琴山間宋乾道中楊秉讀書

處秉故人湯鵬舉入叅大政爲印國子監書籍藏其中

府志云又有玉書案石硯閣今廢

洪永章宅在涇縣舉山下相傳父老嘗得誥勅碑石上

有銀青大夫兵部尚書兼上柱國賜紫金魚袋洪永章

勒

虞璠宅在寧國縣南五里璠宋侍郎虞儔父也隱居於

此

滕慶和宅卽旌德縣會勝寺梁丞相滕慶和居此後捨

宅爲寺

黃顏石室在寧國縣黃顏山頂可容數百人相傳晉永嘉中黃顏修煉於此

瞿硎石室在寧國縣文脊山中晉瞿硎先生隱居於此府志云山有門一名山門洞

宛溪館在府城東宛溪上後為宛陵公署唐李白詩吾憐宛溪好百尺照心明

高齋在府治內齊謝朓守宣城時建因麗陵陽山麓故名明郡守方逢時有重葺高齋記萬曆志謂以廉惠亭改建誤

韓昌黎別業舊址不可考朱子韓文考異云愈有別業在宣城集內示姪爽自京師之宣城詩有宣城去京國

閭里故依然之句

南湖書墅在府城西四十里南碕湖上貢士萃美集云元廣陵侯濬置張養浩諸人題詠



羅隱墅在涇縣小溪唐羅隱居此旁有羅公祠

勇里在涇縣西北後漢建安中太史慈據涇縣孫策擊擒之勇里即此

薔薇塢在旌德縣東宋狀元劉暉讀書於此

曲池在府城北三里唐裴休為宣州刺史時種蓮於此甄塘在涇縣南二里世傳魏甄后所生處

裴公井在府敬亭山南唐裴休鑿色白味甘獨異他井金鷄井在府城北廣教寺右唐黃蘗禪師建寺時有二



金鷄相鬪入井輒泉湧莫測其源其材皆從井湧出
孔子井在寧國縣南一百一十里卽今孔夫關之地相
傳孔子入吳時鑿又有孔子堂堂下有馬跑泉宋吳晦
之詩試向荒祠尋舊蹟一泓堂下馬跑泉

磨崖碑在涇縣石隴洪頭山有石碑字多磨滅其可見
者曰巍巍法宇聖德靈奇天仙作樂神人護持猗與居
士博大能洽跡晦岩泉情存佛法挾黃鶴仙帶白龍水
清淨妙義靈寶至理唐天寶十四載癸巳四月壬申朔
二十八日己亥刻石

巨人跡在旌德縣東鳧山又有馬蹄石搗藥臼龍潭石
相傳竇子明女化青鳧飛去在此

靈根石在府一峯山之巔唐李白題雲根二字至今搨
摹者多

紫陽題石在太平縣長壽鄉獅山有平石丈餘朱子過
訪孫覲題秀陰二字勒其上

奇石仙桃在旌德縣境去資福寺二十步許石澗有桃
樹不花而實兵備使郝壁設亭於此

池州府

石城在府西七十里地名鐵店亦曰倉埠潭以東西兩
石山夾河如城故名漢置縣
虎林城在府西六十五里孫吳時爲戍守處大帝封其
子休爲琅琊王鎮虎林卽此

胡城在銅陵縣東四十里凡八所相去二里許不相連屬相傳古胡王神所築其地澗港皆以胡王爲名一曰宋泰始中晉安王子勛舉兵江州其將劉胡引軍東下築此屯兵因名

石埭故城在石埭縣西一百四十里吳置石埭場梁大同中置縣以貴池源有兩小石埭堰溪水爲名今名七里街

堯城舜城堯城在建德縣南四里舜城在建德縣北二十里舊傳兩帝南巡至此故名

臨城廢縣在青陽縣南五里吳赤烏中析陵陽石城二縣地置今爲臨城鎮

定陵廢縣在青陽縣東北卽今定陵鄉晉南渡後僑置義安廢縣在銅陵縣東三十里唐高祖時分南陵縣置今爲順安鎮

陵陽廢縣在石埭縣東北二里卽猷州城漢置今爲陵陽鎮

晉陽廢縣在東流縣東北卽今晉陽鄉隋置

桑柘門在府城秀山門外虎山之東北通鱗口唐時城門名也又有雙江門未詳何所

仙壇在石埭縣陵陽山中峯之半竇子明仙所唐天寶末建仙壇宮至今祀之

醮壇在石埭縣碧玉泉上其石方平陛級如壇竇子明

嘗醮其上俗呼爲仙人石

梅根監在府東五十里亦曰梅根治六朝皆鼓鑄於此
劉宋泰始中陳慶攻張興世於錢溪不敢越乃於梅根
立砦唐志云南陵縣有梅根鎮蓋其地舊屬南陵也宋
至道三年以池州錢監爲永豐監或曰卽故梅根監
利國監在銅陵縣銅官山唐置銅官塲宋置利國監後
以銅之廢

九華樓在府治九華門上唐刺史李元方建明一統志
云卽九峯樓也

蕭相樓在府城東南隅唐大曆中刺史蕭復建後杜牧
重建名之曰蕭相樓宋蘇轍有詩

秋浦樓在府城東宋紹定戊子郡守趙葵因舊址增築
有石刻蘇軾詞黃魯直字於壁南畿志云明正德戊寅
知府何紹正重建

景蕭樓在府城內萬曆中柳林巷居人李春達掘得斷
碑有景蕭樓上梁文宋狀元陳舜俞撰

順安樓在銅陵縣東三十里臨津舊驛中

賣花樓在建德縣南里許自唐至五代時有花樓二十
四間土人善剪繡作花以市四方置酒會多至此市花
諺云江南茶飯建德先知近樓名胭脂港亦舊管絃地
今悉荒廢

文選閣在府西貯梁昭明文選處今僅存其址

芙蓉閣在李白書堂前

翠微亭在齊山之巔九華清溪秋浦皆隱隱屬望中唐

時建宋岳飛詩經年塵土滿征衣得得尋芳上翠微好

水好山觀未足馬蹄催送月明歸又有三奇亭亭以石

鼓洞仙人橋妙空崑為三奇故名又有青霄亭舊為觀

郡樓宋王哲易今名

神交亭在府城小邱山明李呈祥講學地以遇湛若水

構亭曰神交附明湛若水神交亭記池陽有高士古源


居小邱山十餘年不出志望賢之道聞甘泉子而慕焉然而未嘗識面甘泉亦未嘗識其面而知之賢而敬之曰神交矣或曰面不相識何謂神交甘泉子曰夫人皆識面淺者也而謂上下萬年識堯舜禹湯文武周公孔子何面目而若相知之深焉神交也故孔子夢周公高宗夢傅說舜夢拜平丞黃帝夢遊華胥見堯羹牆皆心也

神也神也者心之所為也故心之神也交通也通天而
天通地而地通萬物而萬物通堯舜禹湯文武周公而
堯舜禹湯文武周公感而通之一氣也氣相通宇宙
而一者也是故一體也一體故氣相通痛癢相關不
交而交矣嘉靖丙午八月甘泉子過池陽登九華之山
古源子出迓焉或曰子十年不為彼鄉士夫出矣不為
郡大夫出矣而為甘泉子出何耶曰吾為道出也非為
甘泉公也相見而懼若平生交焉若魚水不足也執弟
子禮而學焉虔心以相乎神以相授不待口之相語也
深矣何則神交至焉傾蓋次焉故知神之為者可以
盡心矣知心之所為者可以知性矣知性矣知神之為者
可以語道矣盡心知性而存養之可與語學矣盡之矣
古源子返而作神交亭甘泉子為次第其語作亭記甘
泉子喟然嘆曰於平時知子而知神交之道則斯亭斯
記可兩忘矣

弄水亭在府治通遠門外舊橋之西杜牧建取李白欲

弄水中月句為名

貴池亭在府城北五里磯上俗呼為望江亭唐杜牧詩



勢比凌歊宋武臺

翠光亭在池口瀕江宋岳飛詩愛此倚欄干誰同寓目
閒輕陰弄晴日秀色隱空山島嶼蕭騷外征帆杳靄間
予雖江上老心羨白雲關

清溪亭在府清溪鎮又有清溪館

望華亭在九華山西圮橋之右舊各玩華亭馮叔吉重

建易今名領九華眾峯之妙

梅公亭在建德縣治後宋梅堯臣為令有惠政民思之

作此亭附元吳師道記士君子宦遊之方去之數百年

表而章顯之是雖好德之心然其所以使人至此而為
末俗之勸者豈小哉池之建德故宋尚書都官員外郎
國子監直講梅公聖俞景祐間為知縣事集中詩幾百
篇皆在是邑作而當時風物宦况之大畧可考見也後

人嘗於郎官舍西偏為梅公堂以祀之既廢而令柴夢
規重建於縣圃之北世易事更復改縣後之半山亭為
梅公亭以識其舊未幾亦化為荒墟師道之來也按行
遺址見大礎在茅草中堯兒牧豎躑躅其上老木三數
株錯立蒼然為之躊躇太息自是營構之念往來於懷
越明年始克就緒為屋三間限以周垣鍵以外扇飛簷
虛檻高亢疎明既與邑人慰其景仰之思而溪山屋室
環繞映帶又得登臨之美以相樂也當宋之初文體卑
陋公倡古淡之作一變其習歐陽子以一世巨人而盛
推尊之若己弗及又以仁厚樂易溫恭謹實稱其人一
時諸公交口論薦雖仕不大顯而文學行義足以義當
時而表後世矧建德肇邑自唐令長凡幾何人而公之
名獨稱之至今是豈可以勢力致哉使凡吏於此者登
公之亭誦公之詩思公之所樹立以自勵則斯邑之民
將被其賜於無窮也師道於公無能為役然不可謂無
志於自勵者斯亭之作既自為之經營而眾來致助乃
命邑人陶起東草其事不以煩民庶幾可久尚告來者
嗣有葺焉其或迂吾之為漫不顧省任其圯壞泯滅亦
獨何心哉亭成當至元三年丁丑
之歲十二月乙亥明年某月日記

菊江亭在東流縣西菊江門外舊有菊臺瀕大江後建

樓其上名望江樓再易今名向於此祀陶潛故江曰菊
江亭之名亦因此

繡春臺在齊山東岩之巔危檐傑棟巋然屹立宋魏了
翁書繡春臺三字又有紫薇臺在竇雲岩後因杜牧得
名今存石刻數字

昭明釣臺有二一在鎮山下一在和龍山下有玉龍潭
白鶴臺在青陽縣東南保寧觀相傳白鶴真人煉丹處
釣魚臺在青陽縣九華山嘉魚池上相傳竇子明李昭
象垂釣處

李白書堂有五一在府南四十里桃陂一在府南苦行
嶺一在銅陵縣五松山一在石埭縣杉山又一在青陽
縣九華山中宋吳夢禎記云翰林訪道江漢會故友韋
仲堪宰是邑乃卜居焉其居介乎龍女泉之側嘉熙初
蔡元龍訪其遺蹟於化城寺東偏復構斯堂
李昭象書堂在九華山翠羽池

杜荀鶴書堂在九華山東去小龍山三里許舊爲臨城
地

范仲淹書堂在青陽縣東二十里讀山之陽
華岳宅在府南山川壇後岳爲殿前司謀誅史彌遠遇
害有手植松十餘株宅前石狻猊尚存
費冠鄉宅在九華山少微峯

吳用之宅在九華山西坂吳氏自唐以前居之號松陽

宅

新城宅在蓮花峯西亦吳氏宅也唐刺史吳器高築新城精舍

楊梅館在府西九十里石嶺多楊梅唐白居易有楊梅館詩宋改爲驛今呼爲楊梅坦

龍堂精舍在銅陵縣五松山李白與南陵常贊府遊五松山詩有龍堂若可憇吾欲歸精修之句注云銅井西五里有古精舍

陳公園在銅陵縣東鼇首山園內有二池宋蘇軾黃庭堅曾遊此

葉公園在銅陵縣東五十里葉山下宋王安石遊其園戲葉云週廻莫有千秋葉葉隨答云裨補能堪百篋蠶鐵船在銅陵縣五松山前湖田之下首尾船形如積鐵舊傳晉潯陽太守張寬歿爲神於此一夕乘船至爲人所見其船遂溺而露首尾焉

杏花村在府秀山門外里許因唐杜牧詩有牧童遙指杏花村得名南畿志云有古石井圈刻黃公廣潤玉泉六字

國朝郎遂有杏花村志

杜塢在府城西四里因杜牧得名其下有杜湖
閔源在九華山東巖由神光嶺南遶東巖外上中下凡三處皆產茗此閔茶所由名

桃源在建德縣南四十里步頭村水源深邃人跡罕至唐乾符中黃巢之亂邑人多避於此

石印池在建德縣石印山下宋周必大錄云縣北六里斷崖石壁之上有印文圓如馬蹄兩兩相對舊傳許旌陽逐蛟至此所留也

流觴瀨在九華山百丈潭上有石渠唐李昭象與客泛觴於此

黃花驛在東流縣北以陶潛種菊之地故名又有菊所鵲頭戍在銅陵縣鵲頭山六朝皆置戍

黃屯在府東南六十里唐乾符中黃巢常屯此因名有黃屯堰南畿志云東二百里有石岡名鐵券相傳唐賜

巢鐵券處

三墩九曲在石埭縣後南畿志云墩有三以應三台水九曲以應九曜郭璞以厭火災

峽山寨在府西宋開寶七年曹彬伐江南拔峽山寨進克泗州是也

劉公寨在青陽縣南宋建炎中劉光世因險立寨禦張遇於此

丹井在青陽縣九華山北葛洪煉丹井也

金釵井在石埭縣西峨山之麓唐桂盛女畫節處白龜泉在青陽縣化城寺西龜山下蔣之奇題名石上龍女泉在青陽縣東巖相傳金地藏卜居方苦遠汲俄

有少女云石下有泉因以手撥石泉果湧出又有甘泉
在東巖中峯下明嘉靖初湛若水講學於此後建書院
旁有一泉公自署曰甘泉

舒姑泉在石埭縣南三十里蓋山下百步梁劉峻書蓋
山之泉聞弦歌而赴節相傳昔有舒氏女與其父析薪
至此牽挽不動俄化爲泉其母曰吾女性好音樂乃作
弦歌泉涌廻流有朱鯉一雙云

金鷄石在府城西五十里埤雅云江南富姓者莊前一
石月下忽作鷄聲遂名金雞石

天柱石在石埭縣陵陽山唐李白所築

定城石在石埭縣前街中長一丈二尺廣五之一相傳
郭璞遷縣立此石

石鏡在石埭縣樂山其石縱橫二丈光明可鑑人物

鹿跡石在東流縣東六十里相傳葛洪跨白鹿仙去處

江南通志卷三十四終

江南通志卷三十五


輿地志

古蹟六太廬鳳三府

太平府

丹陽故城在府城東五十里接江寧縣界秦置縣始皇
 東巡由丹陽至錢塘卽此漢仍之屬丹陽郡謂小丹陽
 吳範從孫策下小丹陽是也今有丹陽鎮陽亦作楊應
 劭曰丹陽以木名邦晉志云丹陽山多赤柳故名
 姑孰城卽今府治漢丹陽春穀二縣地東晉時置城戍
 守并積鹽米於此城南臨姑孰溪因名

謝公城在府采石鎮晉謝尚鎮牛渚時所築



却月城在府西南三十里天門山上南宋車騎將軍王
元謨所築廣十餘里久廢

蕪湖故城在蕪湖縣東三十里古鳩茲地左傳襄三年
楚子重伐吳克鳩茲是也漢置蕪湖縣今縣東四十里
有鳩茲港

王敦城在蕪湖縣東北一里羅氏園王敦鎮于湖時所
築

南豫州城在縣東北一里金陵志云姑孰之南淮曲之
陽晉成帝咸和四年僑立豫州治蕪湖即此

宣城城輿地紀畧云在蕪湖今邑東尚名宣城門殆晉
時僑立


上黨郡城在蕪湖縣西南五里晉太元間因上黨民南
渡僑立上黨郡及襄垣縣

繁昌故城在繁昌縣西北四十里東晉僑置襄城郡割
于湖為境并置繁昌縣屬焉寰宇記云繁昌本南陵縣
地其地出石綠唐時為石綠場今為舊縣鎮又有襄城
郡址在縣東北延載鄉

赭圻城在繁昌縣西南十里孫吳置赭圻屯晉哀帝召
桓溫入朝至赭圻有詔止溫溫遂築城居此今稱故縣
城

南丹陽廢郡在當塗縣西北梁置

于湖廢縣在當塗縣南三十八里漢丹陽縣地三國吳



為督農校尉治晉太康初始立于湖縣屬丹陽郡

春穀廢縣在繁昌縣西北漢置新志謂在蕪湖縣陶辛

圩者誤按元和志寰宇記皆云在南陵縣境應入繁昌

無疑

天門雙闕在府大信鎮宋大明七年帝西巡有雙爵盤

旋下集繖蓋羣臣呼萬歲詔建雙闕

望江樓在當塗縣慈姥磯相傳梁昭明太子讀書處又

縣東南淨居院亦有昭明讀書臺

太白樓在采石磯即太白祠唐元和中建陸龜蒙詩謝

眺青山李白樓是也

清風樓在蕪湖縣驛山之陽因蘇軾清風閣舊額以命

名

燃犀亭在當塗縣采石牛渚磯上晉溫嶠平蘇峻還鎮

至此聞其下多怪燃犀燭之見水族奇形異狀夜夢人

謂曰與君幽明道別何意相照後人因建亭於此

賞詠亭在采石驛前晉謝尚鎮采石月夜汎舟聞別艇

詠詩邀與談論及旦知為袁宏薦於朝後人遂即事名

亭焉

白紵亭在當塗縣東七十五里昔宋帝與羣臣會此唱

白紵歌故名

姑孰亭在當塗姑孰溪上附唐李白宴姑孰亭序通驛公館

南有水亭焉四葦翬飛巖絕浦嶼蓋有前攝令河東薛公棟而宇之今宰隴西李公明化開物成務又橫其梁

而閣之畫鳴開琴夕玩清月蓋為接輪軒祖遠客之佳境也製置既久莫知何名司馬武公長材博古獨映方外因據胡牀岸幘嘯咏而謂前長史李公及諸公曰此亭跨姑孰之水可稱為姑孰亭焉嘉名勝槩自我作也且夫曹官綬冕者大賢處之若游青山臥白雲逍遙偃傲何適不可小才居之窘而自拘倘若桎梏則清風朗月河英嶽秀皆為棄物安得稱焉所以司馬南隣當文章之旗鼓翰林客卿揮辭鋒以戰勝名教樂地無非得俊之場也干載一時言詩紀志

捉月亭在采石鎮神霄宮內李白泛舟狂醉欲從水中捉月故名亦名暮雲亭相傳藏李白酒錦處宋梅堯臣有詩

十詠亭在府城東唐李白有姑孰十詠因名蘇軾過此讀之笑為贗物見陸游入蜀記

百花頭上亭在府城外尼山巔宋景定五年太守鄭羽

建

蛾眉亭在當塗縣北二十里據牛渚絕壁前直二梁山夾江對峙如蛾眉然故名宋熙寧二年太守張瓌建

孟公亭在當塗縣官圩東岸宋咸淳八年大水知州孟知縉以身捍水水為之卻立亭表焉刻石尚存

思瑾亭即采石驛皇華亭以思周公瑾故名宋真德秀題額

江山好處亭在當塗縣北二十里蛾眉峯左亦名觀瀾

亭附明倪謙江山好處亭記太平為郡在南京之南百里而遠右枕江有山焉曰采石下有磯曰牛渚江自西南來合沅湘漢沔之水直走磯下姑孰之溪則自東折西而橫入於江驚湍駭浪晝夜衝齧有聲磯之南直走天門東西二梁中束一水蒼翠修曲宛若蛾眉舊嘗為亭磯上以占其勝矣去蛾

眉之左下坡數級地勢頗卑而坦迤幽曠山益近而奇
 江益近而駛其地尤勝有非蛾眉所得而擅者舊亦為
 亭於此名江山好處元監府弘吉刺氏易名觀瀾歲久
 傾毀景泰三年豐城李侯若虛來守是郡政平訟理民
 安物阜嘗考尋遺迹以為是亭乃郡之絕景自昔騷人
 韻士若晉溫嶠袁宏謝尚唐李白崔宗之諸賢皆嘗於
 此登眺而吟嘯者也豈惟吾輩政餘可以藉是消煩而
 適意邦人歲時亦得以遂遊觀之樂也客可坐視其廢
 乎乃與同知任能讓通判陳清推官何哀捐俸費為倡
 命廣濟寺僧修惠募材重建亭成諸公與客携酒銷登
 而落之憑高遠望則烟嵐之杳靄雲濤之洶湧風帆沙
 鳥之往來長鯨巨鼉之出没仙梵之廬漁樵之居舉接
 於欄檻之外千態萬貌景象無窮有以使人心開目明
 而神爽飛越於是揚袂引觴曰樂哉斯亭因復其名曰
 江山好處徵記於予予以花鳥本平時可娛之物也然
 感時悵別者見之適足以驚心而飛淚郡之江山信可
 樂矣使為守者政未能敷於下為民者政未能安於上
 外有責於人內有媿於己則登亭也觸物興懷無非悲
 傷感慨之境孰見其為可樂哉今諸公涵煦休養措斯
 民於衽席而民親愛之不翅父母上下之間心乎惠洽
 蓋無適而非可樂者況日當江山之好處哉是宜
 樂其樂而使民同其樂也亭之復古詎不宜乎

湖山烟雨亭在當塗縣東三里月盤山據郡城游觀之

勝

夢日亭在蕪湖縣東一里故王敦城上晉太寧二年王

敦將舉兵內向帝密知之微行至于湖察敦營壘而出

敦正晝寢夢日環其城宋時於此建亭故名

玩鞭亭在蕪湖縣北二十里晉明帝微行察王敦營壘

敦覺使五騎追之帝馳去見逆旅賣食媪以七寶鞭與

之曰後有騎來可以相示追者至問媪媪因以鞭示之

五騎傳玩稽留遂久帝獲免因名亭碑石存

吳波亭在蕪湖縣西門外瀕大江宋隆興二年建張孝

祥書額

志喜亭在蕪湖縣神山巔宋乾道七年秋禱雨於李衛公祠輒應因名

雄觀亭在蕪湖縣吉祥寺右山巔名觀瀾亭西向吳仁傑易使面南

識舟亭在蕪湖縣鶴兒山俯瞰大江舊名八角亭王思任權關時易今名

凌歊臺在當塗縣西北黃山宋孝武帝築以避暑卽宋行宮也面勢虛敞高出塵埜之表唐李白有詩

聯璧臺在采石山江干二石突兀中分一線石刻聯璧二大字

縹緲臺在繁昌縣後山巔下瞰大江前對濡須宋熙寧

間易名表裏江山臺

誓清堂在當塗縣黃山祖逖渡江誓師於此宋嘉熙中吳淵建堂後陳塏以米芾所書極目亭三字易之

揮塵堂在府治臨大池舊名近民吳淵重建易名

盤龍齋在當塗縣南州津晉桓元建齋畫龍於上後劉毅鎮此居之毅小字盤龍遂爲符驗云

橫江館在采石對岸卽和州橫江李白所咏也

滴翠軒在蕪湖縣赭山廣濟院舊名檜軒有宋黃庭堅自書山谷讀書處五字

北園在繁昌縣寶山宋蔡確建

潘閻宅在府西今儒學是

江南通志 卷三十五
郭祥正宅在府東街中有醉吟菴蘇軾過之題詩畫竹石於壁

陳規宅在府東街成賢坊

羅彥輔宅在府西街

張鎰宅在府城東南隅其居曰孝感坊

陶安宅在府城東街明太祖賜額及堂聯

謝朓宅在當塗縣青山一名青山館旁有謝公池陸游

入蜀記云青山市南有元暉故宅基環宅皆青林文篠

清泉奇石真佳處也今爲保和菴

陶弘景宅在當塗縣橫望山今爲澄心寺因話錄云盧

巖說隨鄭常侍遊宣州當塗隱居山巖卽陶貞白煉丹

處也爐跡猶存

李白宅在當塗縣青山之麓白至姑孰依當塗令李陽

冰愛謝家青山有終焉之志

周維長宅在當塗縣橫望山李白有贈橫山周處士詩

李陽冰宅在當塗縣青山陽冰解組後築室青山最深

處重巒疊嶂佳趣萬種今名萬佳山

張孝祥宅在蕪湖縣西南昇仙橋有歸去來堂

張崇義居在繁昌縣城崇義自祖父以來千口同居閨

閫肅然嘉祐中楊傑過其門書義居二字遺之

陵口戍在府北三十里或謂之東陵口晉咸和中蘇峻

自歷陽濟橫江登牛渚軍於陵口胡氏曰在牛渚之東

北亦江濱戍守處

南陵戍在繁昌縣西北下臨江渚六朝時江州東界盡於南陵蓋瀕江津要處也晉陶侃領荊州江州刺史自南陵迄於白帝數千里路不拾遺謂此梁置南陵縣治赭圻城時此地亦置戍承聖初王僧辨討侯景軍於大雷遣前軍侯瑱襲南陵鵲頭二戍克之是也

九龍池在橫山頂有石坎容水僅斗許能不竭內石龍子九枚長數寸黝形高足痴不畏弄昔傳人取其一坎中仍九盡取之坎中亦九也

禁蛙池在蕪湖縣昇仙橋西張孝祥築堂成鄰人以池內蛙鳴爲護孝祥取視投之隨手聲絕

洗硯池在繁昌縣馬仁山唐王沖霄洗硯於此至今池水猶黑

九井在府城南十里晉桓溫所鑿殷仲文九日從桓溫游九井賦詩卽此井通江已竭其五昔有墜鞭於井者從牛渚流出見杜滔北征記

龍泉寺井在府東龍泉山晉螺浮尊者卓錫開此以竹汲之則清冷可飲以繩汲之則泥滓渾濁

洞井宋孝武游姑孰勅謝莊携其子朏從乃使爲洞井贊朏卽於坐奏之帝曰奇童也

謝公井在青山路南有磚甃謝朓鑿

陶弘景丹井在橫望山

唐井在府城東十五里禪岳寺山下闌石鐫元和十二年字

掛袍石在當塗縣白紵山西晉桓溫率賓僚燕飲醉時掛袍於此

丹竈在橫山陶弘景煉丹設也此地環天碧嶂景物奇特所謂丹竈寒烟及五井指此

石鼓在蕪湖縣石臼湖側唐貞觀二年尉遲恭來治郡昇二石鼓以壯其門相傳是石季倫家物

廬州府

合肥故城在今縣北漢置三國時魏揚州都督滿寵以城臨江湖賊得據水爲勢請立城西北三十里依險可

固守謂之新城宋曹朋之記曰合肥入斗度獨多故號金斗城亦曰金斗門今雞鳴山下有新城故址

逡遁城在府東舊梁縣南三十里清水橋後漢志云九江郡有逡遁縣曹操伐吳屯兵於此重築之亦曰曹城晉成帝時僑立於蕪湖縣界

滁陽城在府東北寰宇記云在慎縣東北六十四里小峴城在府東七十里南齊所築詳山川

赭城在縣西北唐光啓二年壽州刺史張翽遣兵寇廬州楊行密將田頔等敗之於赭城是也

梁縣城在府東北七十里漢汝南郡有慎縣劉宋僑置於此屬南汝陰郡宋紹興三十二年避諱改曰梁縣從

舊郡名也今為梁縣鄉

舒縣故城在廬江縣西春秋時舒國秦為舒邑漢文帝封淮南厲王子賜為廬江王都此今縣西南三十里有大城縣西北金牛山下有金牛城蓋即古舒縣遺跡也慕家城在廬江縣東二十里世傳慕容垂屯兵所築龍舒城即舒城縣治春秋為羣舒漢置龍舒應劭曰龍舒即羣舒之邑杜預曰羣舒偃姓舒庸舒鳩之屬今廬江南有舒城舒城西南有龍舒城是也舊說以龍舒為廬江地誤也詳見辨訛
高陽城在舒城縣西南二十里高陽氏封其子庭堅於舒蓼之間故名

黔布城在舒城縣東晉孝武時於黔布城置南新蔡郡屬南豫州尋廢

羹頡城在舒城縣西北三十里漢高帝七年封兄子信為羹頡侯食邑於舒

亞夫城在舒城縣東南十五里相傳周亞夫嘗領兵至此有東西二城其址尚存

周瑜城在舒城縣西十八里今為淨梵寺

舒鮑城在舒城縣西一百里龍舒水南或以為即古舒庸也

霍湖城在舒城縣南五里又花家城一名竹里又圍箕城俱在縣西十里羊舌城一名陽石又繆家城俱在縣

西十五里諸城皆南北朝及南宋初戍守之所
茆城在舒城縣東南十五里亦曹操屯兵所築

新附城在無為州南十五里吳諸葛恪築以居新附之
人今其地為新附橋

桀王城在巢縣臥牛山之陰書所謂南巢也今為紫微
觀

橐臯故城在巢縣西北六十里春秋云哀十二年公會
吳於橐臯漢置橐臯縣橐臯亦曰柘臯舊說以為橐訛
為拓又譌為柘也按杜預注橐音章夜反是橐字本有
柘音非譌也橐臯今為柘臯鎮其東又有會吳城故址
居巢故城在今巢縣東北五里夏商時南巢地周為巢

伯國秦為居巢縣亦曰居鄭今古居巢城陷為巢湖

南譙郡城在巢縣東南二十里晉太元中僑置南譙郡

治山桑縣

九江郡治在無為州襄安鎮秦漢以前江逼城下為舟
車要衝

潁川故郡在巢縣東南劉宋僑置屬南豫州水經注云
寶湖水東出為後塘塘上有潁川僑郡故城

襄安舊縣在無為州南四十里襄安鄉西對臨湖東下
繁昌漢置

臨湖舊縣在無為州西南臨壁山下漢置今為臨湖圩
扶陽舊縣在無為州西北接巢縣界晉太元中僑置

開城舊縣在無為州西四十里唐武德三年置今為開城鎮

無為舊縣在無為州花家疇本巢縣之城口鎮魏武征孫權築城於此攻吳無功因號無為城

蒙古學在無為州今儒學西北大街

吳王宮在廬江縣紫芝坊世傳五代楊行密故宅今為

金剛寺

鎮淮樓在府治明郡守龍誥重建有銅壺以核晝夜時刻

五鳳樓在府東城上唐天祐中張崇創築落成之日有

五色鳥集其上因名

九華樓在無為州移風門上宋米芾建江之南九華諸峯屹然相向因以名樓

稻孫樓在無為州大安門上宋米芾秋日登樓燕集見

田禾已獲復青問諸老農曰稻孫也芾喜而名其樓又

明遠樓在州楚澤門上與羣山相接下臨諸湖米芾題

額

講書樓在無為州城隍廟前謝枋得寓於州州人建此樓居之

聖文祕奉閣在府城宋劉筠知廬州構閣藏真宗飛白書及所賜書顏曰聖文祕奉之閣

五雲閣在無為州城內五雲叟陳明所建

聚山閣在無為州治宋米芾建

景賢亭在府治有晏殊包拯諸公詩刻石甃壁間

威遠亭在府西城上明熊文舉禦寇駐此又作稅于亭

於東郊外

仙隱亭在廬江縣水簾洞上宋隆興初建亭以表左慈

之迹

鵲亭在舒城縣西春秋云昭五年楚伐吳吳人敗諸鵲

岸杜預曰即舒縣之鵲尾渚亦曰鵲亭

飛霞亭在舒城縣署宋李公寅讀書處其兄伯時為畫

舊宅圖蘇軾有詩

教弩臺在府城東門內九獅橋北曹操所築教強弩以

禦吳之舟師

明遠臺在府東北七十里梁縣鄉迴環皆水中有一洲

方輿覽勝云宋鮑照嘗讀書於此

義門臺在府西十八里唐萬敬儒三世同居親亡廬墓

宣宗大中間特表其門

節婦臺在府城內惠政橋東南宋包拯舊第節婦拯冢

嗣總妻崔氏

釣魚臺在廬江縣南八里石磯枕河為左慈垂釣處

避暑臺在廬江縣東北隅舊傳曹操攻吳避暑休兵於

此今為城隍廟

釣魚臺在無為州東北一名濡須口舊傳浮邱伯釣魚

之所

漕臺在無為州城內舊軍學西宋時設漕運司以轉江
襄漕事

四望臺在無為州治內宋英宗時知無為軍滿維端建
孔臺在巢縣西橐皋鎮狀如圓壇可容千人世傳孔子
去楚將適吳駐車於此

懸魚堂在府治西晉羊續為廬江太守有饋生魚者意
難却之乃曝為乾魚懸於壁上他日復饋續乃出所懸
魚示之其人慙懼而退後人為建懸魚堂

三至堂在府治西宋陳堯佐三守是邦故以名堂
西巖書堂在府東巢湖西岸宋安淮有記

萬卷堂在無為州天慶觀西宋祥符中李景仙藏書於
此多祕閣所無者以其半進於朝

仰高堂在無為州治東米芾建

三桂堂在無為州宋王之道與兄之義之深同科故名
其堂曰三桂

馬亮宅在府城和平橋東明改為下察院

包拯宅在府鳳凰橋巷

余闕宅即今合肥縣治明洪武中建恩柱坊尚存

歸來宅在舒城縣治東宋李公麟歸隱處

亞父故居在巢縣東北二十里亞父山皇覽云吏民祭
亞父於居巢庭上長吏初視事必祭而後從政庭中又

有亞父井

同食館在府南城上唐元和中刺史路應求建左傳云楚人出師自廬以往賑廩同食因以爲名後又改名建德館

崇明館在廬江舊縣治南數十步宋謝惟士知縣事省以拓縣治見碑記後爲儒學

璇源館在舒城縣宋元符中李公麟建自爲記

寶晉齋在無爲州治東北宋州守米芾建以晉人法書碑刻嵌壁間因名

迴瀾軒在府南門外香花墩有包孝肅拯祠軒蓋爲公設也

青陽山房在府城東六十里巢湖北元余闕讀書處

環翠山房在府城南湖右永樂港之原元葛聞孫隱居講學之所

歐冶子鑄劍處在廬江縣東北二十里冶父山今爲寺

毛義隱處在廬江縣東北七十里毛公山有讀書洞

梅福真隱處在舒城縣西七十里梅山漢梅福棄官隱此地

八公飛昇處在巢縣西橐臯鄉八公山列仙傳云八公白日上昇遺藥在器雞犬皆得仙

花園在府城南二十里元至正間宣讓王遊賞之所其址尚存

回車街在巢縣西北十五里兩山夾峙中通一綫俗傳孔子於此回車

陰陵道在無爲州黃洛河東北卽田父給項羽處

鑊里在巢縣西北濱焦湖吳太平二年孫綝拒諸葛誕於壽春大發兵出屯鑊里帝亮責綝留湖中不上屯一步者是也

姚萇村在巢縣東新安鄉相傳東晉時姚萇駐師屯田於此

春秋山莊在舒城縣春秋山宋李公麟讀書處公麟有春秋山莊四時樂詞又有洗硯池亦公麟遺蹟

文翁莊在舒城縣南九十里漢文翁嘗讀書於此

濡須塢在無爲州東北五十里一名偃月城吳用呂蒙策夾水立城狀如偃月有東西二關其地峻險東卽濡須塢西爲巢縣七寶山相對爲吳魏相持之所

藏舟浦在府城內古金斗門外昔魏將張遼襲吳藏戰艦於此

箏笛浦在府城后土廟側相傳曹操溺妓舟於此漁人夜聞箏笛聲今猶然也

煉丹池在府城東四頂山上漢人魏伯陽煉丹之所故址尚存

墨池在無爲州治宋米芾所鑿蛙聲聒人取片瓦濡墨書之投諸池蛙鳴遂絕又大書墨池二字石刻今尚存

偃月池在無為州治南每中秋夜月偃半輪故名

洗耳池在巢縣教場西相傳是許由舊蹟

東典堤在無為州黃洛河吳諸葛恪作大隄築兩城使

全端留畧守之梁郡陽王範亦嘗屯兵於此

三堰在舒城縣南漢羹頡所築詳見碑記此一邑之水

利也

嗟虞墩在府東北八十里世傳項羽於此別虞姬

香花墩在府城南濠水中蒲葦數里魚鳧上下長橋徑

度竹樹陰翳舊為包拯讀書處

舒王墩在舒城縣北四十里舊傳漢羹頡侯築此侯封

於舒故謂舒王墩

摩旗墩在舒城縣南十五里世傳漢壽亭侯駐兵於此

金雞墩在舒城縣西一里下有金雞潭明秦民悅建書

院於此

劉郎寨在廬江縣牛欄山自麓至走馬嶺上凡十數里

寨址寬平可容萬眾險要可守

金華寨在廬江縣黃屯山上勢最險要

安樂柵在無為州東北梁太清末合州刺史鄱陽王範

屯於濡須遣世子副將兵守安樂柵明年嗣破侯景將

任約於三章遂徙鎮焉亦謂之安樂柵胡氏曰三章在

濡須之東

狀元井在府學宋馬亮擢進士第一故名

瑠璃井在巢縣城北中有四柱色如瑠璃

笑泉在巢縣南七十里聞人笑聲則泉湧沸故名

浮邱釣石在巢縣濡須口水濱一大石上鐫四字舊傳

浮邱釣石

隋碑在巢縣紫微觀開皇十四年造今可見者只十數字

鳳陽府

西古城在府東十八里舊時軍壘也

魯城在府西魯山之東今有東西魯城村皆以此爲名

一說晉太康五年鍾離移治於此改名魯城縣

紫金城在府城外萬壽山前

鍾離城在臨淮縣東四里古鍾離子國春秋時互爲吳

楚邊邑漢置鍾離縣屬九江郡治有東西二城濠水流

於其中名三牛城以郡治有三石牛也郡介濠涇間多

水災牛土畜故以鎮之

漢下相故城在臨淮縣西北

公路城在臨淮縣舊城東相傳袁術據淮南時所築

小東城在臨淮縣東寰宇記云城在東北三里宋泰始

二年築以鎮濠口陳太建五年廢通釋云秦始皇築當

是泰始之訛

樂平舊城在臨淮縣東南本漢縣屬東郡江左僑置於

鍾離郡界新志云有香城在州東六十里字家莊亦名

東鄉城疑是其遺址

趙草城在臨淮縣東距邵陽洲數里梁天監五年曹景宗於此築壘俾牧人得過淮北縱芻牧使別將趙草守之因以名城

向城在懷遠縣西北四十里渦水之陽春秋云莒人入向杜注曰譙國龍亢縣東南有向城漢置向縣水經注云北淝水經向縣故城南俗謂之圓城或謂團城

當塗城在懷遠縣西南二十里古塗山氏國漢置當塗縣屬九江郡今為馬頭集水經注云淮水經馬頭城北魏馬頭郡治即當塗故城也

平阿故城在懷遠縣西南六十里戰國時齊邑漢為縣水經注云淮水北合沙水淮西岸有平阿縣故城今有平阿集在縣西南平阿山下俗譌為平莪按魏收志云譙州高塘郡有平阿縣在今天長縣及高郵州界蓋梁時僑置於此非故縣也

義成故城在懷遠縣東北十五里漢為侯國水經注云北淝水經義成南世謂之楮城非也其地當渦水入淮處亦名渦口舊縣志云有拖城在縣東北十五里即古渦口城地明一統志謂義成在縣西北四十里誤

龍亢城在懷遠縣西北七十里漢置縣屬沛郡今為龍亢集

考城在懷遠縣南五十里沈約宋志云盱眙郡有考城



縣蕭齊因之魏廢蓋卽此

荆山城在懷遠縣北三里亦謂之舊城梁天監中魏人以梁堰淮水命楊大眼鎮荆山因築城置戍焉

邊軍城在懷遠縣西八里宋末江淮安撫使夏貴所築新城在懷遠縣南四十里宿州北境亦有新城

曲陽城在定遠縣西北九十五里秦置縣應劭曰曲陽者以在淮曲之陽也後漢以下邳有曲陽改曰西曲陽水經注云洛水經淮南曲陽故城又北歷秦墟秦墟蓋亦當時戍守處也與曲陽相近

陰陵城在定遠縣西北六十里莫邪山南卽漢兵追項羽失道之所秦置縣後漢爲九江郡治

東城在定遠縣東南五十里元和志云項羽敗走東城卽此秦置寰宇記云梁天監間改爲定遠

馬邱城在定遠縣西南二十五里卽漢志當塗縣之馬邱聚也一名藍柵城

芰蒲城在定遠縣西南八十五里芰蒲塘下寰宇記云梁魏交併之日魏築爲壘亦名定遠城

閭城在定遠縣西北一百十五里相傳魏主燾南侵時所築魏收志云楚州有沛郡領蕭相已吾三縣蓋卽此柴王城在定遠縣東北七十里大橫山上

羊城在虹縣西北四十里今爲湖或曰卽相城之訛也相城見宿州

霸王城在虹縣南三十里相傳項羽屯兵處

夏邱城在虹縣東一里寰宇記云堯封禹爲夏伯國於此故名漢置縣

僮縣故城在虹縣東北七十里秦縣漢屬臨淮郡明一統志云又有僮都城在縣北一百二十里卽漢取慮縣下蔡城在壽州西北三十里春秋州來邑也吳季札始邑於延陵後邑於此哀二年蔡昭侯自新蔡遷於州來謂之下蔡漢置縣又棟城在下蔡西北花苑城在下蔡城東南五里

安豐城在壽州南八十里按今霍邱縣西南界有魏置安豐郡故址卽漢安風縣也此則晉時僑置者沈約宋

志云南豫州安豐郡江左僑立今爲安豐鄉

劉關二城在壽州正陽鎮與潁州接界先主與關羽分城屯軍在此

硤石城在壽州西北二十五里硤石山上兩岸相對淮水經其中相傳大禹所鑿因於山上結二城以防津要三國魏志云甘露元年諸葛誕據壽春司馬昭遣王果軍硤石以逼之梁天監十四年亦築城於此爲魏所克梁城在壽州東北胡三省通鑑注云晉僑立梁郡於壽春界故有梁城其城在壽陽東北鍾離西南

青岡城在壽州西二十五里晉謝元等禦秦師時築

義昌城在壽州西南永初郡國志云安豐有義昌縣晉

未嘗立郡

狄城在壽州南梁普通五年裴邃自合肥拔魏狄城本傳作狄邱城水經注云肥水經狄邱東右會拖水枝津又北至成德是也

黃城在壽州西梁置黃城戍尋置潁川郡於此寰宇記云晉義熙十二年置小黃縣在安豐西北三十里或卽黃城也又西有郭默城相傳晉咸和中郭默常屯此陳大建五年吳明徹攻壽陽別將克黃城郭默城降是二城相近也

蒼陵城在壽州西北魏收志云壽春縣有蒼陵城水經注云淮水自潁口左又東經蒼陵北是也

安城故城在壽州南魏志梁置新興郡治安城縣卽此馬頭戍城在壽州西北二十里淮濱戍守處也梁天監五年取魏合肥魏人守壽陽於馬頭置戍普通五年梁取壽陽亦置於此或以爲卽馬頭郡誤又馬頭東南有白捺城又南有歐陽城皆梁魏邊戍之地

魚林城在壽州南安豐塘側鴛鴦門又鬪鷄城在州西南三十里

符離城卽宿州治故楚邑秦置縣

陽城在宿州南秦置縣陳勝生此

相縣故城在宿州西北相山下春秋時宋邑秦置縣漢爲沛郡治今爲相城鄉水經注云睢水東逕相縣故城

江南通志 卷三十五
南宋恭公之所都也或譌爲襄城

蕪縣故城在宿州南楚邑也秦置縣元和志云宋於此置譙郡齊以爲北譙郡隋廢郡復爲蕪縣又有庸城在蕪西

臨渙城在宿州西南九十里戰國宋銍邑也秦置銍縣梁普通中克魏銍城因置臨渙郡以臨渙水爲名今爲渙陽鄉

靈璧故城在宿州西北項羽追擊漢軍至靈璧睢水上卽此孟康曰靈璧故小縣在彭城南括地志云靈璧故城在符離縣西北九十里

臨潼故城在靈璧縣東北七十里魏置臨潼郡今爲潼郡集或入虹縣或混爲取慮城皆誤

霸王城凡三俱在靈璧縣一縣西南七十里一縣西北七十五里一縣北七十二里皆項羽屯軍之壘

穀陽故城在靈璧縣西南七十五里漢置縣
浚陽故城在靈璧縣南五十里漢侯國東漢爲浚縣亦名濠城魏收志云穀陽郡連城縣有濠城卽漢浚縣地今爲濠城集

仁州故城在靈璧縣東南魏收志云仁州梁武置治赤坎城領臨潼郡及己吾義城二縣

固賢城在靈璧縣北七十里舊傳爲晉綢繆盈地後去金爲固又有古城在縣西北百里近河岸相傳關羽張

飛會於此

竹邑縣治在宿州北二十五里漢初置竹縣晉曰竺邑今為符離集

廢汴郡在懷遠縣西南魏收志云譙州有汴郡梁武置治蕭縣有平阿山其地當在今縣西南與壽州之廢下蔡縣相近

臨濠郡在定遠縣梁置

陳留故郡在壽州南寰宇記云陳留廢郡在故安豐東北五里又浚儀廢縣在縣東北二百五十步雍邱廢縣在縣南六十里小黃廢縣在縣西北三十里又南有都陸城漢博鄉縣也三國吳朱異留輜重於都陸即此

朝歌舊縣在臨淮縣東劉宋置魏收志云縣有九山城黃溪水齊周時廢今黃溪在縣東界

灌邱舊縣魏收志云鍾離郡領灌邱縣有劭陽城蓋在今臨淮東北與劭陽洲相近

壽春舊縣即今壽州也戰國末楚考烈王徙都命之曰郢秦置縣漢為九江郡治輿地記云壽陽城中有二城一曰相國城宋武帝伐長安時築一曰金城壽陽中城也又州西四十里有壽春故城北臨淮水相傳考烈王蓋治此又州東有諸葛城相傳諸葛誕所築

成德舊縣在壽州東南漢置水經注云肥水經成德縣故城西又北至芍陂也

江南通志 卷三十五
崇義舊縣在壽州東南宋志云南梁郡有崇義縣羌人所立

肥陵舊縣在壽州東南新唐書志云安豐縣武德七年省肥陵縣入蓋唐初所置也

留邱舊縣在宿州東北六十里漢置

廣平舊縣在宿州西南魏武定六年置

斛城舊縣在宿州東北亦曰朝斛縣魏武定中置水經注云泚湖水東至朝斛亭即朝斛之訛也

白禪舊縣在宿州西南七十里隋志云臨渙郡有東魏白禪縣新志云有白善集蓋即白禪之譌也

丹城舊縣在宿州西南仁義鄉隋志云臨渙郡有魏丹

城縣

定陶舊縣在宿州定陶山下後魏僑置

新豐舊縣在宿州北七十里魏武定六年置今爲新豐集

龍山舊縣在宿州西南龍山集寰宇記云在臨渙縣西四十五里北齊置

諸陽舊縣在宿州西北唐武德四年分符離縣置今州西有諸陽山蓋故縣在此

陽平舊縣在靈璧縣南晉元帝僑置陽平郡於徐州連城舊縣在靈璧縣南魏收志云穀陽郡首領連城縣齊周時廢有連城鋪在縣南百里蓋因故縣爲名

亳社在宿州相山宋共公都相因置亳社

潛龍殿在臨淮縣開元寺內南唐李昇微時嘗寓寺中

故名

南華樓在臨淮縣逍遙臺前萬曆中重建有莊周像

望僊樓在臨淮縣城內相傳藍采和仙去人於此望之

因名

清淮樓在臨淮縣舊郡治子城上唐張頔詩云觀魚惠

子臺蕪沒夢蝶莊生塚本秋惟有清淮供四望年年依

舊背城流

元勳閣在府治西南明為功臣建

含桃閣在臨淮縣舊為郡解西齋宋梅詢為守呂夷簡

為倅晏憇於此

第一山亭在府龍興寺內明洪武十六年建有御書第

一山三大字碑

翛然亭在臨淮倅廳子城上舊名觀瀾元祐中王雍為

郡丞因晉簡文帝翛然臨水便有濠濮間想語乃易今

名


四望亭在舊府城唐刺史劉嗣之建李紳記云雲山左

右長淮縈帶下繞清淮旁闕城邑紳矮小時號短李俗

呼為短李亭

枕淮亭在舊濠州治子城上宋時建一名望淮

聖水亭在懷遠縣大禹廟前歲旱禱雨輒應元人構亭



其上

死虎亭在定遠縣西南水經注云閭潤水西北經死虎亭夾橫塘西注宋泰始間殷琰於此築壘拒劉劬之兵齊永元二年蕭懿討裴叔業亦屯兵於此通典云在壽州東四十里悞也詳見辨訛

對池亭在定遠縣西北七十里相傳宋趙倚所作池卽槎枒寺白蓮池

鵲甫亭在定遠縣鵲甫谿水西北流經此亭下

婁亭在虹縣東北左傳云楚人敗徐於婁林杜預注曰僮縣東南有婁亭

鷄備亭在安豐故城西南春秋云昭公二十三年吳敗

頓胡沈蔡陳許之師於鷄父杜預注曰安豐南有鷄備亭是也

黎漿亭在壽州東南魏甘露中吳將朱異救諸葛誕於壽春進屯黎漿是也水經注云芍陂瀆北分爲二水一水東注爲黎漿水又東經黎漿亭南謂黎漿水口

尉武亭在壽州北宋元嘉中劉康祖還守壽陽至尉武去壽陽數十里爲魏將追及卽此

晝涼亭在壽州北五里下有石屋

袤亭在宿州西春秋云桓公十五年公會宋公魏侯陳侯於袤伐鄭杜預注曰相縣西南有袤亭

芳亭在宿州北卽唐咸通中官軍敗賊處又州城內有

柳溪亭

扶疎亭在宿州北城上宋蘇軾守徐時嘗遺墨竹一本於宿宿人鐫石構亭貯焉故名扶疎明弘治初州守曾顯庸修復之

張氏園亭在靈璧西鳳山下或曰在鹿鳴門外附宋蘇

軾張氏園亭記道京師而東水浮濁流陸走黃塵張氏

之園於汴之陽其外修竹森然以高喬木蒼然以深其中因漫漫之餘浸以為陂池取山之怪石以為巖阜蒲葦蓮芡有江湖之思倚桐檜柏有山林之氣奇花美草有京洛之態華堂厦屋有吳蜀之巧其深可以隱其富可以養其菜蔬可以餉隣里魚鼈蒲筍可以餽四方之賓客余自彭城移守吳興由宋登舟三宿而至其下肩輿叩門見張氏之子碩碩求余文以記之惟張氏世有顯人自其伯父敷中君與其先人通判府君始家靈璧而為此園作蘭皋之亭以養親其後出仕於朝名聞一時推其餘方日增治之於今五十餘年矣其木皆十圍


崖谷隱然凡園之百物無一不可人意者信其用力之多且久也古之君子不必仕不必不仕仕則忘其身必不仕則忘其君譬之飲食適於饑飽而已然士罕有蹈義赴節其處者安於故而難出出者徂於利而忘返於是其有違親絕俗之譏懷祿苟安之弊今張氏之先君所以為其子孫之計慮遠且周是故築室藝園於汴泗之間舟車冠蓋之衝凡朝夕之奉燕遊之樂不求而足使其子孫開門而出仕則跬步清朝之上閉門而歸隱則俯仰山林之下於以養生治性行義求志無適而不可故其子孫仕者皆有循吏良能之稱處者皆有節士廉退之行蓋其先君子之澤也余為彭城三年樂其土風將去不忍而彭城之父老亦莫余厭也將買田於泗水之上而老焉南望靈璧鷄犬之聲相聞幅巾杖屨歲時往來於張氏之園以與其子孫遊將有日矣

觀魚臺在府西七里莊子與惠子觀魚處亦名莊周臺

觀星堂在府獨山頂上明洪武初建

將臺在府西古城之東

逍遙臺在臨淮縣開元寺後唐刺史梁延嗣累土為臺



刻莊子像覆以亭

義臺在定遠縣東二十里五代時有梅氏居此宗族聚居鳴鼓會食南唐後主築臺表之

判虎臺在定遠縣治宋包拯爲令時有虎傷人拯移牒於神虎自赴縣繫於臺前石今臺石俱存

春申君臺在壽州城東北隅相傳楚春申君黃歇築

鳳凰臺在壽州南門外

鬪鷄臺在壽州西南三十里明一統志云俗傳二金鷄鬪於此

張飛臺在壽州西陽鎮東南四里

米家臺在壽州正陽鎮西相傳宋米芾所築

曬書臺在宿州閔孝鄉閔子墓側

莊子臺在靈璧縣潼山

望荆臺在靈璧縣荆人宦此思親築臺望焉今斷碑存吹簫臺在靈璧縣西北七十里

三賢堂在臨淮縣城東北隅宋時建祀彭祖莊子惠子明正統二年沒入於淮

威信堂在臨淮縣內宋淳熙時濠帥王回陞辭上諭以守邊之道無出威信二字因以名堂

靜正堂在臨淮縣舊郡治堂後又有清風堂皆宋時建薛長卿宅在宿州相城內中元寺長卿初以魯詩傳龔勝龔舍後爲御史大夫東歸沛守遠迎尊禮殊至郡人

以爲榮

桓譚藏書處在宿州漢成帝以譚藏書多令待詔門下時謂挾桓君山之書富於猗頓之財今蕩花墅是也劉巘故里在宿州相城澤門內

奕壇在臨淮縣西南二里會仙觀前刻石爲棋枰傍有二竈可置子

水館在臨淮縣舊濠州治唐張祐有詩又高唐館在舊濠州治西

漆園在定遠縣東六十里卽莊周爲吏處唐天寶中尚有漆樹一二十株野火燔燒今爲壟畝

國府園在宿州相城北相傳內有宋伯姬黃堂基卽伯姬焚死處

飲馬池在壽州東南百里相傳漢英布飲馬於此

留犢池在壽州城西南隅漢時苗來令壽春駕一犍牛至後生犢一及去任曰此淮南所產也留之州人遂以名池

惠子窰在臨淮縣治西南三里相傳惠子遊濠上時居此

夢蝶坊在臨淮縣開元寺西莊周嘗寓此

撒金街在臨淮縣內藍采和曳錢仙跡在此

樂安鄉在虹縣廢僮縣界漢匡衡封樂安侯卽此

大澤鄉在宿州西南故蘄縣西水經注云蘄縣有大澤

鄉陳涉起兵於此

睡僊崖在臨淮縣曲陽門外有石崖長二丈餘中有一段平坦約六尺世傳有僊嘗臥此

垂花塢在臨淮縣唐刺史獨孤及有詩並序

乘龍洲在臨淮縣東北淮水中流周世宗征濠夜遣兵持炬乘橐駝絕淮濠兵驚以爲鬼乘龍也

莊眉戍在懷遠縣西北魏置齊建元二年魏人攻鍾離徐州刺史崔文仲遣兵渡淮攻破其莊眉戍是也

禹墟在懷遠縣東南水經注云禹墟在塗山西南其地有禹會村卽此蘇軾詩曰樵蘇已入黃熊廟烏鵲猶朝禹會村是也

蒲姑陂在虹縣北左傳云昭公十六年齊伐徐至於蒲隧杜預謂取慮縣東有蒲姑陂是也

竹垺在虹縣東北七十里淩河岸

石寨在府萬歲山頂築有石垣

連珠寨在壽州北五里紫金山腰有石甃大路遺址尚存周世宗屯兵處

花靨鎮在壽州西北二十五里相傳以宋武帝女壽陽公主名宋紹興二年廬壽鎮撫使王亨收復安豐軍之花靨鎮蓋州境戍守要地也

趙步在壽州東北淮河北岸水濱泊舟之地以趙氏居此名胡氏曰趙步南直紫金山

曹營在靈璧縣西南一百三十里相傳曹操立營於此
垓下聚卽漢兵圍項羽處漢志云浚縣有垓下聚元和
志云垓下聚在虹縣西南五十四里蓋在今靈璧縣東
南

樓子莊在今靈璧縣西三十里

戚家灣在靈璧縣北七十里小河南相傳爲漢高祖戚
夫人之故里

九井在壽州南汲一井則諸井皆動

淬劍泉在府遺碑村相傳莫邪劍成以此水淬之

楚泉在定遠縣西六十里漢泉在定遠縣西五十里源
出楚泉二泉並行自南而西合流入洛達於淮

珍珠泉鳳臺縣城北五里聞人聲則泉迸如珠一名咄
泉非有二泉也

盤屋槃在府治南山中古槃也

行色詩石刻在壽州舊安豐縣宋待制司馬池嘗監酒
稅作行色詩後孫宏爲之刻石

漢碑在宿州相祠內八分體所謂三百有五碑也又有
宋宣和封崇惠侯勅碑亦在祠內

解帶石在臨淮縣清流門外俗傳項羽解帶飲石上卽
此

啓母石在懷遠縣禹廟西石形如老嫗

秦橋山石在虹縣城東陡門山產美石宋都汴時采石

於此

宣和石在靈璧縣西二十里外沿途多奇石

魏昌城在壽州八公山東南魏延昌初梁作淮堰揚州

水漲刺史李崇更起此城以備水州人號曰魏昌城寰

宇記云有石城在縣北四里卽此



江南通志卷三十五終

